



SLUŽBA ZA REVIZIJU FINANSIRANJA POLITIČKIH STRANAKA

Na osnovu člana 10. stav (1) Zakona o finansiranju političkih stranaka ("Službeni glasnik BiH" broj 95/12), člana 25. Pravilnika o godišnjim finansijskim izvještajima političkih stranaka ("Službeni glasnik BiH" broj 96/13) i člana 12. Pravilnika o administrativnim procedurama pregleda, kontrole i revizije finansijskih izvještaja političkih stranaka ("Službeni glasnik BiH" broj 103/08), izdajem

IZVJEŠTAJ O PREGLEDU GODIŠNJEG FINANSIJSKOG IZVJEŠTAJA ZA 2012. GODINU HRVATSKE STRANKE PRAVA HERCEG-BOSNE

Broj: 03-07-6-668/13
Sarajevo, 30. jun 2014. godine

SADRŽAJ

MIŠLJENJE REVIZORA	3
1. UVOD	4
2. PREDSTAVLJANJE POLITIČKE STRANKE	4
3. OPIS PREGLEDA I KONTROLE FINANSIJSKOG IZVJEŠTAJA.....	5
Predmet pregleda i kontrole	5
Cilj pregleda i kontrole	5
Obim pregleda i kontrole	5
4. PRETHODNE KONTROLE I REVIZIJE	5
5. NALAZI I PREPORUKE	5
5.1. NALAZI.....	5
5.2. PREPORUKE.....	7

MIŠLJENJE REVIZORA

Služba za reviziju finansiranja političkih stranaka izvršila je pregled godišnjeg finansijskog izvještaja Hrvatske stranke prava Herceg-Bosne za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Rukovodstvo političke stranke je odgovorno za finansijske izvještaje, postupanje stranke u skladu sa odredbama Zakona o finansiranju političkih stranaka ("Službeni glasnik BiH" broj: 22/00, 102/09 i 54/10), koji je bio na snazi do 04.12.2012. godine, Zakona o finansiranju političkih stranaka ("Službeni glasnik BiH" broj: 95/12), koji je na snazi od 05.12.2012. godine i člana 15.10 Izbornog zakona BiH, te uspostavljanje efikasnog sistema internih kontrola

Pregled smo obavili u skladu sa revizijskim standardima primjenjivim na angažmanu u pregledu. Ovi standardi zahtijevaju da planiramo i izvršimo pregled da bi dobili umjerenu pouzdanost da stranka nije značajno kršila odredbe Zakona o finansiranju političkih stranaka.

Pregled je ograničen na kontrolu godišnjeg finansijskog izvještaja političke stranke i primjenu analitičkih procedura na podacima iz finansijskih izvještaja, pa prema tome ne obezbjeđuju pouzdanost koja bi se dobila izvršenom revizijom u prostorijama stranke.

Na osnovu našeg pregleda utvrđeno je sljedeće:

Pregledom godišnjeg finansijskog izvještaja za 2012. godinu, utvrđeno je da je Hrvatska stranka prava Herceg-Bosne prekršila odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

Pregledom, odnosno kontrolom finansijskih izvještaja, nismo zapazili ništa značajno, osim gornje napomene, što bi ukazalo na finansiranje ove političke stranke suprotno odredbama Zakona o finansiranju političkih stranaka, niti na finansiranje troškova izborne kampanje suprotno odredbama člana 15.10 Izbornog zakona Bosne i Hercegovine.

1. UVOD

Služba za reviziju finansiranja političkih stranaka (u daljem tekstu: Služba za reviziju) izvršila je pregled godišnjeg finansijskog izvještaja Hrvatske stranke prava Herceg-Bosne za 2012. godinu i finansijskog izvještaja za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Pregled i kontrola finansijskog izvještaja su provedeni u skladu sa članom 25. Pravilnika o godišnjim finansijskim izvještajima političkih stranaka i članom 2. Pravilnika o administrativnim procedurama pregleda, kontrole i revizije finansijskih izvještaja političkih stranaka.

Zbog činjenice da nije obavljena revizija u prostorijama političke stranke, postoji mogućnost da pojedine materijalno značajne greške ne budu otkrivene.

Prema podacima iz godišnjeg finansijskog izvještaja Hrvatska stranka prava Herceg-Bosne je ostvarila ukupne prihode u iznosu od 16.086,00 KM, čija struktura je data u sljedećoj tabeli:

Red. br.	Vrsta prihoda	Iznos u KM	Učešće u uk. prih. %
1	Članarina	0,00	0,00%
2	Prilozi fizičkih lica	200,00	1,24%
3	Prilozi pravnih lica	0,00	0,00%
4	Prihodi od imovine	0,00	0,00%
5	Prihodi od pr.lica	0,00	0,00%
6	Prihodi od poklona	3.500,00	21,76%
7	Prihodi iz budžeta	11.976,00	74,45%
8	Ostali prihodi	410,00	2,55%
	Ukupni prihodi:	16.086,00	100,00%

U godišnjem finansijskom izvještaju stranka je iskazala ukupne rashode u iznosu od 19.661,00 KM.

2. PREDSTAVLJANJE POLITIČKE STRANKE

Naziv političke stranke: Hrvatska stranka prava Herceg-Bosne. Skraćeni naziv: HSP H-B.
Dana 09.03.2010. godine, Hrvatska stranka prava Herceg-Bosne upisana je u registar Općinskog suda u Mostaru rješenjem broj: R/1-10.

Sjedište političke stranke je u Mostaru, Kraljice Katarine 11.

Ovlaštena lica za predstavljanje stranke su Vesna Pinjuh, predsjednica i Ivan Tokić, zamjenik predsjednice.

Lice ovlašteno za finansijske izvještaje je Vesna Pinjuh.

Prema podacima iz godišnjeg finansijskog izvještaja za 2012. godinu, Hrvatska stranka prava Herceg-Bosne ima sljedeću organizacionu strukturu:

- Predsjedništvo HSP H-B,
- ŽV HSP H-B Posavske županije i
- 4 podružnice.

3. OPIS PREGLEDA I KONTROLE FINANSIJSKOG IZVJEŠTAJA

Predmet pregleda i kontrole je godišnji finansijski izvještaj Hrvatske stranke prava Herceg-Bosne za 2012. godinu i finansijski izvještaj za period od dana podnošenja prijave za ovjeru za izbore do dana ovjere rezultata Lokalnih izbora, održanih u oktobru 2012. godine.

Cilj pregleda i kontrole je da revizor na bazi finansijskog izvještaja pokuša da ustanovi da li je politička stranka u izvještajnom periodu postupala u skladu sa odredbama Zakona o finansiranju političkih stranaka i odredbama člana 15.10 Izbornog zakona BiH. Ukoliko revizor na bazi kontrole finansijskog izvještaja utvrdi određena kršenja navedenog zakona, ocjenjuje da li je potrebno izvršiti terensku reviziju da bi mogao izraziti mišljenje o tome da li se stranka finansirala u skladu sa Zakonom o finansiranju političkih stranaka.

Obim pregleda i kontrole finansijskih izvještaja Hrvatske stranke prava Herceg-Bosne obuhvata kontrolu i provođenje analitičkih procedura radi utvrđivanja usklađenosti podataka koje je stranka iskazala u finansijskom izvještaju sa odredbama Zakona o finansiranju političkih stranaka i odredbama člana 15.10 Izbornog zakona BiH, odnosno usklađenosti izvora finansiranja i načina trošenja sredstava, sa posebnim naglaskom na prihode iz budžeta i troškove izborne kampanje.

4. PRETHODNE KONTROLE I REVIZIJE

Obavljen je pregled godišnjih finansijskih izvještaja Hrvatske stranke prava Herceg-Bosne za 2010. i 2011. godinu, nakon čega su izdati izvještaji o pregledu sa mišljenjem revizora, nalazima i preporukama.

Nakon izvršenog pregleda za 2011. godinu, Služba za reviziju je izdala Izvještaj o pregledu godišnjeg finansijskog izvještaja Hrvatske stranke prava Herceg-Bosne sa mišljenjem revizora, nalazima revizije i preporukama stranci da vodi potpune evidencije o svojim prihodima i rashodima i da finansijske izvještaje popunjava u skladu sa odredbama Pravilnika o godišnjim finansijskim izvještajima političkih stranaka.

Nerealizovane preporuke:

Na osnovu uočenih nedostataka u godišnjem finansijskom izvještaju za 2012. godinu, utvrđeno je da Hrvatska stranka prava Herceg-Bosne nije ispoštovala ranije date preporuke.

5. NALAZI I PREPORUKE

5.1. NALAZI

Hrvatska stranka prava Herceg-Bosne prekršila je odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

Na osnovu obavljenog pregleda, utvrđeno je da Hrvatska stranka prava Herceg-Bosne nije vodila potpune evidencije o prihodima i rashodima i da obrasce godišnjeg finansijskog izvještaja za 2012. godinu nije popunila u skladu sa odredbama tada važećeg Pravilnika o godišnjim finansijskim izvještajima političkih stranaka („Službeni glasnik BiH“, broj 61/06) - u daljem tekstu: Pravilnik, čime su prekršene odredbe člana 11. stav (1) i stav (3) Zakona o finansiranju političkih stranaka, koji je bio na snazi do 04.12.2012. godine.

- (1) Hrvatska stranka prava Herceg-Bosne je u svojim poslovnim knjigama i godišnjem finansijskom izvještaju za 2012. godinu iskazala putne troškove u ukupnom iznosu od 2.071,00 KM.

Pregledom je utvrđeno da je stranka na kontu putnih troškova evidentirala troškove dnevnica u iznosu od 1.871,00 KM, te troškove goriva po putnim nalogima u iznosu od 200,00 KM.

Uvidom u putne naloge utvrđeno je da su putni troškovi isplaćeni licima koja nisu zaposlena u stranci.

Obzirom da je stranka izvršila isplatu putnih troškova fizičkim licima koja nisu zaposlena u stranci, smatramo da je stranka imala obavezu da na sve isplate, u skladu sa poreskim propisima, izvrši obračun poreza na dohodak i pripadajuće doprinose.

Iz navedenog slijedi da troškovi i obaveze po osnovu poreza na dohodak i pripadajućih doprinosa na sredstva isplaćena fizičkim licima nisu iskazani u poslovnim knjigama i godišnjem finansijskom izvještaju stranke.

- (2) Pregledom je utvrđeno da je stranka u obrascu 3 (ukupni prihodi političke stranke) godišnjeg finansijskog izvještaja iskazala sredstva koja su joj uplaćena iz Budžeta BiH po osnovu povrata takse za ovjeru političke stranke za učešće na Lokalnim izborima 2012. godine u iznosu od 400,00 KM kao ostale prihode, čime je prekršila odredbe člana 13. Pravilnika.

Služba za reviziju je utvrdila da je HSP H-B, dana 25.05.2012. godine, u svrhu prijave za učešće na Lokalnim izborima 2012. godine uplatila taksu u iznosu od 2.800,00 KM. Takođe je utvrđeno da su dana 28.12.2012. godine na transakcijski račun stranke vraćena sredstava od uplaćene takse za ovjeru učešća stranke na Lokalnim izborima 2012. godine u iznosu od 400,00 KM.

Na osnovu navedenog, utvrđeno je da stranka nije ostvarila prihode po ovom osnovu, odnosno da je ukupne prihode u poslovnim knjigama i godišnjem finansijskom izvještaju iskazala u većem iznosu za 400,00 KM u odnosu na ostvarene.

Služba za reviziju je, takođe, utvrdila da su troškovi takse za ovjeru Hrvatske stranke prava Herceg-Bosne za učešće na Lokalnim izborima 2012. godine iznosili 2.400,00 KM, a ne 2.800,00 KM, koliko je stranka iskazala u obrascu 4 (ukupni rashodi političke stranke) i 4-1 (režijsko-administrativni i ostali troškovi) godišnjeg finansijskog izvještaja, čime su prekršene odredbe člana 20. i 21. Pravilnika.

- (3) Uvidom u poslovne knjige utvrđeno je da Hrvatska stranka prava Herceg-Bosne nije u poslovnim knjigama evidentirala troškove zakupa poslovnog prostora koji je koristilo ŽV Posavske županije za decembar 2012. godine u iznosu od 250,00 KM, troškove električne energije za decembar 2012. godine u iznosu od 31,33 KM za poslovni prostor u Odžaku i troškove telefonskih usluga u iznosu od 19,15 KM za HSP H-B Mostar.

Obzirom da nije evidentirala sve troškove nastale u 2012. godini, Hrvatska stranka prava Herceg-Bosne nije u poslovnim knjigama iskazala ni sve obaveze na dan 31.12.2012. godine.

- Služba za reviziju je utvrdila da je stranka u godišnjem finansijskom izvještaju troškove zakupa, troškove električne energije i troškove telefonskih usluga iskazala u manjem

iznosu za 300,48 KM u odnosu na ostvarene, čime je prekršila odredbe člana 20. i 21. Pravilnika.

Takođe je utvrđeno da stranka nije u obrascu 5 (pozajmice, krediti i dugovanja) iskazala obaveze na dan 31.12.2012. godine koje su prema podacima iz poslovnih knjiga i dodatne dokumentacije iznosile 1.300,48 KM, čime je prekršila odredbe člana 23. Pravilnika.

Troškovi izborne kampanje

Prema odredbama člana 15.10 Izbornog zakona BiH, politička stranka za potrebe izborne kampanje ne smije potrošiti više od 0,30 odnosno 0,20 KM¹ po biraču u svakom izbornom krugu, prema broju birača koje je objavila Centralna izborna komisija BiH. Hrvatska stranka prava Herceg-Bosne je, prema podacima Centralne izborne komisije BiH, u svrhu izborne kampanje mogla da potroši 61.282,50 KM.

Prema evidencijama iz poslovnih knjiga Hrvatska stranka prava Herceg-Bosne ostvarila je troškove izborne kampanje u iznosu od 1.895,40 KM.

5.2. PREPORUKE

Preporučuje se Hrvatskoj stranci prava Herceg-Bosne da se pridržava odredaba Zakona o finansiranju političkih stranaka, a posebno na osnovu uočenih nedostataka se preporučuje:

- *da vodi potpune evidencije o svojim prihodima i rashodima i*
- *da finansijske izvještaje koje podnosi Centralnoj izbornoj komisiji BiH popunjava u skladu sa Pravilnikom o godišnjim finansijskim izvještajima političkih stranaka.*

KOMENTAR:

U ostavljenom roku, Hrvatska stranka prava Herceg-Bosne nije dostavila primjedbe na Preliminarni izvještaj o pregledu godišnjeg finansijskog izvještaja za 2012. godinu.

šef Odsjeka za revizijske poslove

Sanja Tošović, revizor

šef Službe za reviziju

mr. sc. Hasida Gušić

¹ Član 15.10 stav 2. Izbornog zakona BiH propisuje da se maksimalno dozvoljeni iznos za finansiranje izborne kampanje izračunava tako što se broj glasača u svim izbornim jedinicama u kojima politički subjekt ima kandidatsku listu ili kandidata pomnoži sa: 30 feninga za načelnika opštine odnosno gradonačelnika i za članove skupštine opštine, članove Narodne skupštine RS i Predstavničkog doma Parlamenta Federacije BiH, članove Parlamentarne skupštine BiH, člana Predsjedništva BiH, i predsjednika i potpredsjednike RS, odnosno 20 feninga za izbore za članove kantonalnih skupština.